

四庫全書

史部

欽定四庫全書

史部

欽定八旗通志卷

一百六十三至
一百六十四

欽定四庫全書

欽定八旗通志卷一百六十三

人物志四十三

大臣傳二十九

滿洲正白旗八
德福 伊勒圖

三格 觀保
額森特 阿滿

泰 珠爾格德 台斐英阿

三格

三格滿洲正白旗人姓棟鄂父納親官至副都統
乾隆二年三格由生員授藍翎侍衛洊授二等侍

衛十八年遷鑲白旗蒙古副都統十九年四月調
三姓副都統五月調黑龍江副都統尋

命領索倫巴爾呼兵三千赴西路軍營二十年四月分
領第三隊索倫兵由西路進勦六月同都統策楞
駐巴里坤辦事八月逆賊阿睦爾撒納叛其黨阿
巴噶斯哈丹掠台站

諭同策楞防勦九月仍留駐巴里坤時策楞為叅贊大
臣奏俟兵械齊進勦

上以策楞怯懦逮問三格係領隊大臣一意推諉亦革職留軍營効力二十一年二月管理特納格爾台站

諭曰三格自革職後効力軍營尚屬黽勉著加恩給副都統銜以示鼓勵九月補正白旗蒙古副都統十一月以兵二百接阿卜達禮托賴及阿察郭勒台站擒戮呼爾璫賊衆五十餘十二月勦呼爾璫台吉賽音伯勒克等游牧於喀拉烏蘇盡收其駝馬

諭部議叙給三等輕車都尉世職尋隨大軍赴木壘烏
蘭烏蘓科舍圖搜緝叛賊巴爾雅及札哈沁游牧
得

旨嘉獎

賜玉韞荷包鼻煙壺二十二年三月同侍衛圖倫楚奇
徹布等由朱爾都斯進勦先是定邊將軍成衮扎
布檄三格追叛賊那扎噶爾布未成擒九月我兵
至博羅和羅遇叛黨額林沁達瓦等百餘戶三格

突擊之適布魯古特台吉琿齊呼爾璦台吉達瓦
斬扎那噶爾布赴總管端濟布營詐降並請招額
林沁達瓦三格信之遽撤兵還未幾琿齊等遁
敕將軍兆惠勘奏兆惠奏三格受欺狀

命革副都統及世職以兵丁効力二十三年隨將軍兆
惠勦逆賊霍集占於葉爾羌至黑水被圍偵賊輜
重積城南謀由城東渡轉戰往取賊旅拒三格與
原任前鋒統領鄂實侍衛特通額總兵高天喜力

戰俱歿於陣事

聞

諭曰三格奮勇殺賊盡瘁捐軀深為憫惻著照伊原任副都統從優議卹尋

賜祭奠入祀昭忠祠諡剛勇給騎都尉兼一雲騎尉世職以其子薩炳阿襲二十五年

命圖形

紫光閣

御製贊曰琿齊潛遁疎防降謫從軍贖罪每戰必力黑
水殞命豁罪論功圖像紫光表忠無窮

觀保

觀保內務府正白旗滿洲人姓索綽絡乾隆二年
進士改庶吉士四年散館授編修六年五月充雲
南鄉試正考官十二月在

南書房行走八年二月充

日講起居注官四月遷侍講九年十二月提督安徽

學政十二年

詔留任十三年五月轉侍讀六月遷國子監祭酒閏七月擢內閣學士八月署刑部侍郎十四年正月兼國子監祭酒充

經筵講官十二月授兵部侍郎仍署刑部侍郎十七年充武會試正考官二十年在

尚書房行走二十二年六月教習庶吉士十二月兼管正白旗滿洲副都統二十五年充浙江鄉試正

考官七月教習庶吉士二十六年三月充會試副考官六月國子監將報滿教習沈若木引

見摺內既引吏部原議或以教職或以知縣用恭候欽定又聲叙該員係進士曾經歸班以知縣選用

上以祭酒陸宗楷有心取巧觀保等扶同具奏下部嚴議尋部議陸宗楷觀保俱請革職得

旨從寬留任二十七年五月調吏部侍郎兼翰林院掌院學士閏五月教習庶吉士八月充順天鄉試副

考官二十八年以吏部侍郎管理兵部侍郎二十九年二月調兵部侍郎奏言講官恭纂

記注例於內閣查

上諭絲綸外紀各檔敬謹編輯其添叙事由以所貯六部通政司副本為據兼查六科存注紅本各部院陞補官員及自行陳奏事件由各衙門造冊送館必冊檔詳明紀載方為詳核乃奉行日久所送冊檔漸圖省便多有脫遺咨查需時請

敕各部院衙門於每年正月將上年事件詳細造冊派員查閱送館得

旨先行三十年七月授左都御史三十一年正月北城御史素爾訥奏北城文移檔案皆另貯城外控呈俱在漢御史家投遞非慎重公事之道

上命觀保等查奏尋覆奏北城案卷自乾隆二十六年後俱貯書吏家餘四城查問巡視各員均藏公署應令北城將案卷查存公署巡城御史交部察議

書吏責革至尋常事件各城原在署接收設遇緊
急事件彼此觀望必致遲悞請無論滿漢準其接
收即日會同商辦

上責其所查糊塗

命軍機大臣詢問辦理另奏大學士公傅恒等查奏五
城文移檔案俱不存貯公署該堂官查問時朦混
回覆請將巡視中東西南四城御史交部嚴處五
城滿漢御史應每日進署控呈公同辦理遇昏夜

緊急事件始準私宅接收次日會辦得

旨俞允三十二年教習庶吉士三十三年四月兼署禮部尚書十月吏部司員姚左垣馬道周議處山西學政呂光亨失察逆犯張廷端但呈照馮鈐從寬革職留任例於吳華孫李宗文實降之案並未查送

上以其避重就輕下都察院議處觀保將姚左垣等議照推諉遺漏例降抵罰俸

上責其徇庇下部嚴處部議革任得

旨寬免十二月調補禮部尚書兼鑲白旗蒙古都統三十四年二月侍郎邁拉遜查奏

咸安宮官學教習曠功

上責觀保管理官學日久並不實力整頓下部嚴察議奏部議革任

詔免之十月國子監遺失書籍交部嚴議部議革任諭曰公過處分適年率從寬予以留任使衆人見因公

議處仍得安享高官益增其不肯實心任事之念觀保自用為部院大臣兼管旗務二十餘年於各任內應辦之事從未見其認真經理虛有其表毫無實際非國家得用之人何必令其徒曠職守著革任仍在尚書房行走十二月署左都御史充

經筵講官三十五年五月

諭曰八阿哥並未具奏入城觀保以阿哥師傅不行勸阻甚屬非是著革職八月授左都御史仍帶革職留

任充順天鄉試副考官三十六年三月充會試副

考官五月充

國史館副總裁三十七年二月

上御經筵觀保進退失次不能終講

命革去頂帶從寬留任三十九年七月兵部侍郎高樸

奏內監高雲從洩道府記載觀保與侍郎蔣賜榮

吳壇在九卿班私論道府記載優劣

諭曰觀保屢次獲罪本一庸材更何心覲顏論事而蔣

賜榮吳壇皆新進平等材具祇宜恪勤供職何可于
九卿班上議論道府朕於用人黜陟權不下移豈在
下所能窺測伊等議論優劣其意何居且其所議論
者何事何人觀保蔣賜榮吳壇身為九卿豈宜如此
多事俱著革職交刑部查審並著伊等各將議論情
節明白錄供由刑部堂官具奏越日又

諭曰硃批記載乃

皇考世宗憲皇帝留意人材以備隨時錄用實屬法良意

美所當永遠遵守至于所用道府亦不過照例補放
或後經督撫叅劾朕亦從無庇護若其中果有才本
平常或夤緣倖得九卿等確有實據不妨據寔叅奏
朕必為嘉獎又何所容其私相議論乃觀保等既不
能指實直陳徒于班聯上妄行竊議意欲何為況觀
保本屬庸材屢經護譴將賜榮吳壇甫經擢用宜恪
勤奉職又何假評論人材乎嗣經大學士舒赫德等
覆鞫請加刑訊

諭曰觀保等明知交結內監探聽記載情罪重大冀圖
躲避重譴不肯供認設伊等果無其事高樸何能憑
空捏造至所稱九卿同在一處不敢妄行私議九卿
盡在豈肯盡為隱瞞之語更屬荒唐此等口舌案件
原無憑據九卿等誰不欲置身局外此時即問之九
卿又孰肯為之質證況九卿除觀保等外豈無探聽
記載未經高樸指奏之人朕亦不屑因此一一窮治
遽興大獄也至刑部請旨刑訊殊屬無謂伊等皆一

二品大員即加刑訊亦不過用刑套問虛應故事伊等若復堅供如前刑部又如何辦理豈因觀保等不肯承認轉將高樸訊究坐以誣奏之罪尚復成何事體且此後誰復肯以衆人情偽據實直陳耶觀保等探聽記載竊議道府優劣一節伊等雖狡詞隱飾揆之于理其肺肝自不能掩朕今亦不復窮究試令觀保等捫心自問又豈能盡昧天良乎高雲從現已照御前大臣及行在刑部所擬即行正法所有觀保等

一案著交刑部按律定擬具奏尋問擬斬候九月

諭曰觀保蔣賜榮吳壇身為大臣不知安分奉職輒敢私議道府優劣蔣賜榮吳壇甚有向太監高雲從探聽記載之事其罪均無可逭幸當朕勵精圖治朝政肅清之時伊等尚不任意妄為否則不知何所底止是以不得不為審訊以飭綱紀但念其尚無交通結納行賄營私大弊觀保蔣賜榮吳壇俱著加恩釋放觀保著以無頂帶人仍在阿哥書房行走効力贖

罪四十一年卒

諭曰觀保在尚書房行走有年尚屬小心勤謹今聞其患病溘逝著加恩給還左都御史原銜

德福

德福滿洲正白旗人姓伊爾根覺羅初任刑部筆帖式乾隆二年授堂主事八年遷員外郎十二年遷郎中十三年授浙江金衢嚴道十五年調杭嘉湖道十六年遷浙江按察使疏言浙省沿海知縣

員缺以縣丞陞補者向例三年報滿即得與久任
知縣一體題陞未免過優嗣後應先令試俸二年
果稱職寔有政績方准寔授再三年俸滿方准題
陞下部議行十七年遷湖北布政使十八年調廣
西布政使二十一年調福建布政使二十七年四
月疏言各省軍流人犯照道里表安置福寧府屬
者至二百餘名恐聚處滋事請各省應發福寧府
屬軍流人犯解赴巡撫衙門勻撥安置不必徑解

福寧府從之七月

命往阿克蘇辦事三十年閏二月烏什回人以副都統
素誠苦累激變叅贊大臣納世通調官兵及布魯特
人往勦德福以阿克蘇庫貯軍器火藥無幾恐各
城官兵至不敷配給行文喀什噶爾葉爾羌速由
台站運送並催令伯克色提巴勒底赴阿克蘇辦
事疏至

諭曰軍器火藥自屬緊要但各城大臣既領兵會勦自

必攜帶豈有專俟阿克蘓預備之理況此時各台站
俱有回人保無心懷叵測妄行攘奪德福何見不及
此再所奏阿克蘓辦事不可無大伯克因行文楊應
琚等催色提巴勒底于入覲歸途之便馳驛速赴該
處尚屬可行色提巴勒底抵阿克蘓日即留彼辦事
尋伊犁將軍明瑞抵烏什查奏納世通弁塔哈安
自尊大任用辦事之七十四等並多派回人服役
即大伯克亦令向伊長跪當小伯克賴黑木圖拉

倡亂城內回衆尚未盡變弁塔哈遽用鎗礮攻城以致回人出拒倉卒敗北及領隊大臣觀音保赴援而納世通等復派回人二百供官兵薪水役且賦稅更較伊犁各城為重烏什之亂寔因擾累所致疏入弁塔哈納世通于軍前正法

諭德福與弁塔哈同在阿克蘇辦事俱無端緒令明瑞定擬具奏尋議革職

諭曰德福同弁塔哈在阿克蘇辦事弁塔哈妄自尊大

德福未能規正每相附和又將無關緊要事件由六
百里馳奏弁塔哈既以失機正法德福亦應治罪因
諭明瑞等定擬具奏但其獲罪情由尚不至如弁塔
哈之甚德福著革職發往伊犁効力贖罪三十三年
七月授刑部員外郎旋授湖北按察使三十五年
三月署湖南巡撫十月署四川總督三十六年正
月暫署雲南總督疏請將永順鎮屬龍陵營騰越協
南甸汛缺額兵就近于永順鎮標及騰越協營舊

存兵內選補足額其原營額缺原營如數募補又
奏永昌府龍陵廳東西界騰越保山南界宛頂大
渡昆連潞江遮放芒市三土司袤延九百餘里同
知一員未免顧此失彼請將鶴慶州觀音山巡檢
移駐龍陵專司監獄捕務以資佐理均下部議行
又疏劾提督常青偷安違例乘轎營兵缺額久不
募補

上以彰寶在雲貴總督任曾面奏常青有褒無貶

勅令明白回奏彰寶覆奏常青辦理邊務認真尚無驕
縱劣蹟疏入報

聞又奏土司田賦輕民人貪利典買夷人生計日絀經
大學士傅恒曾于善後事宜案內奏准凡民人典
擺夷田畝限年退歸彼時只查辦關外干崖盞達
南甸隴川猛卯遮放芒市七處潞江土司居騰越
腹地差役尤繁田多被民誘典應飭永昌府諭令
首報酌原價多寡限十年八年為率收租已敷原

本即將原產退還夷人以後永禁典押夷地違者
治罪

上從之五月授四川總督

諭曰滇省軍營應辦諸務德福若有所見不妨具摺陳
奏德福因密陳關外崎嶇瘴癘我師難以襲擊緬甸
狀

諭曰德福至四川所陳緬賊各情形一摺識見乖謬緬
地水土惡劣我兵難于深入自不宜復議大舉墮其

術中而賊匪反覆頑梗亦豈可竟置之不聞因議于
秋冬之間派兵襲擊出其不意並非欲直搗阿瓦亦
非欲竟取猛密不過躡彼疆境乘勢誅掠焚燒令賊
匪知我並未歇手庶幾稍知畏懼送還內地之人以
完此局就事而論寔有不可不如此辦理者何至過
于顧慮襲擊亦不可行耶前諭德福到川即接受總
督印辦理小金川軍務若執此懦怯庸謬之見恐其
於進剿事宜轉致貽悞德福著即來京候旨又

諭曰德福前在阿克蘇辦事曾獲罪譴經朕棄瑕錄用
數年之內由臬司簡任巡撫因其尚知寔力奮勉復
加恩擢用總督乃甫至四川即意存自滿全不似向
年之寔心任事且敢逞其乖謬之見借滇省事宜欲
以諷諭罷小金川之事夫小金川番酋格桑去年
秋間與沃日土司構衅侵擾經阿爾泰前往曉諭僧
格桑即遵守約束歛跡歸巢彼時以番蠻互相仇殺
乃其常事且既已遵諭退回原可無庸再辦曾未半

年而僧格桑復敢乘間圍攻沃日且及明正土司此
豈可復以口舌化導若不用兵擒勦使番衆知儆何
以申威令而靖邊隅乃阿爾泰辦理此事毫無定見
惟圖遷就完局因令德福即赴川督之任協同妥辦
冀其經畫得宜尅期集事孰意德福尚未接印即生
畏事之心希欲阻撓軍務妄奏取巧深負朕委任之
恩著革去總督賞給三等侍衛以已力前往伊犁聽
候委差四十年十月

命回京署刑部侍郎四十二年二月署倉場侍郎七月
實授十月擢刑部尚書四十三年七月兼署禮部
尚書八月兼署鑲藍旗滿洲都統四十四年正月
兼署左都御史五月

命協同尚書福隆安留京辦事四十六年二月暫署兵
部尚書五月疏言旗人置產向在兩翼監督稅契
民人置產則在大宛二縣近旗下家奴置產防家
主知覺潛赴大宛稅契旗員亦多隱旗籍赴縣納

稅請嗣後旗人無論官員閑散家奴凡置房產概
令呈明本管佐領赴左右翼監督衙門稅契如私赴
兩縣者以違制論官員交部議處閑散家奴鞭責
仍令補稅換照廷議從之七月疏請將都司以下
官記名者俟扣滿二年方准陞用再扣二年令督
撫出具考語送部引

見得

旨此等人員自奉旨記名後兵部向例扣足二年即予

陞用再扣二年後遇有應陞缺出又復遞用似此按
年遞陞殊覺過驟嗣後叅將副將等官記名者仍照
舊例交軍機處辦理外其遊擊以下人員交兵部記
名者統限扣足三年准予陞用一次所有該員記名
之處即行註銷著為令九月卒

諭曰刑部尚書德福老成歷練宣力有年茲聞溘逝深
為軫惜應得卹典著該部察例具奏尋

賜祭塋如例諡勤肅子榮桂官至奉天府府尹以不親

往查灾革任

伊勒圖

伊勒圖滿洲正白旗人姓納喇乾隆九年襲世管
佐領授三等侍衛累遷侍衛班領二十四年授鑲
紅旗蒙古副都統赴烏魯木齊辦事二十五年調
駐阿克蘇二十九年回京襲其祖噶都渾所遺雲
騎尉世職三十年赴阿克蘇辦事三十二年五月
授伊犁叅贊大臣八月調駐哈什哈爾三十三年

三月授正白旗護軍統領署伊犁將軍事六月授理藩院尚書七月授伊犁將軍九月授領侍衛內大臣十月丁母憂回京三十四年三月授副將軍赴雲南軍營

恩賞銀千兩治裝十月隨經畧大學士傅恒分路進軍賊衆潛至夏鳩江灘築寨伊勒圖偕叅贊大臣阿里衮攻其西岸奪寨三殺賊五千餘獲器械無算得

諭初次即獲勝覽奏欣慰十二月撤兵還京三十五年
正月授兵部尚書二月授伊犁將軍六月疏言土
爾扈特汗渥巴錫台吉策伯克多爾濟並舍楞等
率部衆三萬餘戶來歸先期遣使至伊犁具書通
款自言為阿玉奇汗正系向居俄羅斯地願為臣
僕久不獲間今自彼逸出行萬餘里六閱月始抵
卡倫乞准入

覲以伸積誠渥巴錫等尋先後至伊犁

上以土爾扈特向化歸順

命伊勒圖加意撫綏俾得所詳見

御製土爾扈特歸順及撫恤二記七月以前雲南撤兵
時並未請罪現又奏涼州莊浪兵應賠馬價銀令
挑補原缺之熱河兵丁代扣兩經部議革職得

旨留任十二月疏言伊犁現由哈薩克布魯特來投誠
之厄魯特甚多請增佐領從之三十六年正月疏
言內地重犯及蒙古厄魯特回犯應照人數派兵

解送如哈薩克布魯特等犯除特派官押送外仍
派兵遞解至交界處取接收官結方回有疎脫即
將該官兵治罪原派押解官叅處議如所請七月
命往烏什辦事授叅贊大臣十月調赴塔爾巴哈台十
一月疏言塔密爾向設部院章京一把總一綠旗
兵二十喀拉喀兵十管理貿易漢人官兵所需糧
米即由其看守之倉庫內支領領完後須從烏里
雅蘓台運取今塔密爾貿易漢人無多年久並未

生事若特留官兵防守不惟糜餉又生交接之繁
請裁汰各令本處當差其倉庫所餘銀米運送烏
里雅蘇台備用軍機大臣議行旋因舒赫德劾領
隊大臣鄂津私用隨甲種地引屯田水灌私田褫
鄂津職伊勒圖久任將軍並不糾叅又鄂津擅動
官駝賣私鹽伊勒圖曾給路引部議革任得

旨寬免三十八年疏劾藍翎侍衛弼三等違禁與哈薩
克市馬請革職効力贖罪

上是之復授伊犁將軍

上以伊勒圖在塔爾巴哈台辦理妥協

諭接任叅贊大臣慶桂仿其規制辦理三十九年疏請
代辦渥巴錫築倉積貯事

諭曰朕覽伊勒圖屢次所來奏摺數語即明之事必牽
引別項填入觀之煩瑣即以此次所奏令渥巴錫等築
倉一案論之渥巴錫屯田原為養贍如一年收割稍
豐必須積貯不過令將餘糧收貯以備不繼則伊等

自知愛惜不至拋棄矣前以伊等初來歸附諸事未
安不得不代伊辦理今已熟諳如此事俱代辦從此
無完畢日矣此即伊勒圖煩瑣無濟于事處將軍管
轄寬廣兵弁衆多辦事應度其要領簡斷為之不必
過為搜求四十年六月疏言部咨禁止烏鎗土爾扈
特等係新歸附人牧馬防野獸須用烏鎗若概禁
止不惟生計無益反致生疑不便一體收禁

上是之十二月疏言伊犁屯田兵三千現改駐携眷兵

而綏定城內僅容駐一營且兵房年久多壞現咨
調安西沙州巴里坤等處兵赴伊犁興修其餘各
屯散處水足地厚之區應就近增建城堡查塔爾
奇溝口外烏可爾博爾蘓克東察罕烏蘓霍爾果
斯巴彥岱等處距屯所不遠請即于此數處建築
議從所請四十四年疏言伊犁鑄錢所需銅前奏
歲由南路各回城辦運兼配黑鉛點錫鑄以放餉
嗣烏什將庫存停運葉爾羌銅及喀什噶爾舊存

銅運至寶伊局配鑄今銅已用完祇存辦運之銅
將來鑄錢日少查伊犁所屬哈爾海圖地方產銅
臣就近赴山試採二三年間已獲九千餘觔應酌
量加鑄庶錢可流通而餉銀亦可減調報

聞四十六年閏五月疏言烏什現無庫存普爾之銅本
年八月即需新鑄者接濟臣通盤籌酌烏什年獲
銅觔悉鑄普爾猶不敷用每年烏什庫車哈喇沙
爾三城在內地調銀三萬兩若停鑄將銅運送伊

犁必致缺乏且烏什所鑄普爾以一當十每百值銀一兩今解伊犁改鑄需錢八百作銀一兩糜費轉多又言伊犁崆郭羅鄂博一帶產煤商人願充窯戶者請聽其便酌收稅課均

報可六月

諭來京四十八年加太子太保

賞戴雙眼花翎四十九年四月疏言都統海祿奏請烏魯木齊遣犯俱派入鐵廠捐貲効力五年為民再

限十年回籍查伊犁遣犯數千若俱令入廠是為
奴人犯到即當差殊無區別各廠口糧亦不敷給
恐日久人衆滋事於極邊要地未宜再遣犯每年
終查辦一次實能悔過守分始許該管官保送准
其為民今概以五年為民該犯等恃有定限無以
分別示儆應仍遵向例辦理議如所請五十年七
月卒諡襄武

命入祀賢良奉

旨伊犁圖在外宣力多年於辦理蒙古厄魯特等部落
事務二十年来頗為鎮靜而衆部落亦皆心服且久
任伊犁將軍辦事妥協著加恩由雲騎尉晉一等伯
世爵即著伊子哲臣泰承襲仍賜銀一千兩經理喪
事令御前侍衛豐伸濟倫馳往致奠

御製詩悼之曰伊犁廿載宴邊陲不動聲色靜鎮之充
國屯田誠制勝子儀召飲感無欺長城萬里外萬里
柱石念茲允在茲分我憂心西顧久優恩施那減心

悲

額森特

額森特滿洲正白旗人姓台褚勒初以前鋒馬甲
從征伊犁乾隆二十三年右部哈薩克與塔什罕
相攻叅贊大臣富德使額森特諭令歸順哈薩克
成悅遣人入

覲額森特護送至京擢藍翎侍衛尋遷三等侍衛三十
二年遷二等侍衛三十四年從經畧大學士公傅

恒征緬甸十月攻老官屯舟師泊江岸陸兵先發
賊突出犯傅恒令額森特等率索倫兵邀擊賊披
靡既而分兩翼犄角進賊悉出拒額森特以左翼
兵橫馳之賊潰竄三十六年從副將軍溫福征小
金川攻巴朗拉額森特奪東面山峯毀其碉

賜號丹巴巴圖魯大兵取達木巴宗額森特由別道出
山北連破碉卡至資哩與大兵合三十七年正月
偕侍衛彰霽等攻資哩山破五十餘卡得碉七

三月資哩賊乘夜築卡額森特率兵百邀擊於卡外阿喀木雅賊數百踵至三卻三進額森特中鎗力擊敗之於是南北兩山官兵乘勢合勦賊夜遁克資哩居數日攻址山之普爾瑪寨自普爾瑪至美美卡中間大碛四賊倚為聲援額森特設計盡取之四月丙寅朔偕總兵馬彪伏兵東崖奪賊水碛翌日并奪普爾瑪寨庚辰攻東瑪賊由別斯滿山梁來援額森特設伏截擊暮收兵賊躡我後還

戰斬二十餘級旋奪東北三卡毀峯下諸碉戊子
逼東瑪夜半賊二隊來犯額森特伏兵卡旁羣起
合擊殲之擢頭等待衛甲午賊分兩道一由別斯
滿一由色爾渠將夾犯大營額森特與總隊德赫
布分伏南北隘逆擊之賊大敗旋出賊不意薄其
碉突入額森特被鎗呼戰益力遂克東瑪

諭曰額森特在軍營奮勉出力攻取東瑪寨又因奮勇
得傷著給副都統職銜七月攻美美卡同彰霸策應

中路取旁碉夜半繞山徑黎明會攻中碉與彰霽
分道射賊南北兩山賊皆遁遂取美美卡九月繞
路頂宗山而右渡河撲兜烏山寨十月拔路頂宗
碉授鑲黃旗蒙古副都統十一月自穆拉斯廓繞
至博爾根奪山巔大寨復由北山下夜渡南至納
拉覺山仰攻克碉十二卡十五進擊格實迪又襲
破公雅山踰木爾古魯山麓取溝內寨卡並據嘉
巴山十二月授領隊大臣是月小金川平三十八

年正月將軍溫福抵功噶爾拉山令額森特與副都統普爾普等率兵二千先發功噶爾拉者兩金川接壤要隘也峯峩銳積雪塞蹊徑賊多設碉阨險拒守額森特督兵騰雪磴直上副都統烏什哈達繼之漸克旁碉二月戰於固木卜爾山斬賊四十餘奪卡一隨與都統海蘭察合攻得碉卡五遂隨溫福移營木果木會攻昔嶺昔嶺多賊碉其阨要大碉十額森特分攻第九碉第十碉迸擲火彈

乘賊恟懼疾馳入或殪之碉外或仆之碉中賊立
盡顧見七八兩碉峻鉅復與海蘭察等合攻往來
冰雪中會日暮乃毀已獲之兩碉佯退以誘賊果
有賊四百來襲伏兵噪而前師還戰殲賊大半三
月破昔嶺第五碉閏五月移攻達札克角山梁四
月復攻昔嶺相持數十日六月戊戌木果木大營
陷癸卯叅贊大臣海蘭察聞副將軍阿桂在當噶
爾拉令額森特率兵千開後路賊據薩穆果穆橋

不能進阿桂已全師徹駐翁古爾壘

上命阿桂為定西將軍進勦十月甲寅額森特與總兵
海祿等由資哩南北山分進賊據北山橋築卡固
守額森特衝擊奪其橋卡即與海祿夾攻阿喀木
雅之東溝總兵成德亦至三路會勦賊夜竄追至
坡下殲之酣戰一日夜向晨進攻阿喀木雅山四
面騰上奪其碉乘勝直取木蘭壩又蕩掃鄂克什
官寨賊奔潰十一月大兵抵路頂宗額森特越山

南踞高俯瞰官兵頂趾相接攀堞躍入砍賊數十
餘多墮崖死進攻明郭宗賊竄逸獲窖內藏糧遂
復美諾獲大礮四礮山礮八

上以攻復美諾諸處額森特督兵勇往授正紅旗護軍
統領

賜御用黑貂冠一三十九年正月偕海蘭察率首隊兵
至谷噶山下谷噶山外有山曰喇穆喇穆峯勢峻
陡海蘭察與侍衛公保寧從旁進額森特當其前

夜乘雪影穿箐越險直前奮擊轉戰至黎明已二十餘里始見高峯列大碛九繚石墻俄雪霧交作官兵乘晦抵碛趾賊不敢出乃攻取其左右山梁及附近之僭巴拉克山峯斬三十餘級又見喇穆喇穆之東有色依谷山高出羣峯即于是夜襲擊復勝之遂與海蘭察兵合時海蘭察亦據最高之登古山與羅博瓦山相對險特甚二月乙未額森特與海蘭察襲其後兵從石罅躍登林中賊斃如

雨我兵氣益振及第三峯麓賊數百從高而下海
蘭察鑾戰額森特等合力迎擊賊屢敗頃之復有
數百賊分三隊冒死衝突連殪數十人餘帶箭遁
賊猶抗守羅博瓦山庚子擲火彈焚之丙午攻克
第二峯礪

上獎其奮勉授散秩大臣三月進勦得斯東寨額森特
斫寨門縱火賊出追殺之賊又以雪夜刼副將常
祿保營額森特聞鎗聲急赴援内外夾擊賊敗走

四月賊乘雨霧建二碉于羅博瓦山額森特與海
蘭察亦乘夜雨密率兵八百薄碉趾毀墻入賊驚
竄追斬數人平其碉

上謂海蘭察額森特等於大雨中殲賊毀碉足壯我軍
之氣破賊人之膽五月賊夜刦烏什哈達營額森特
追擊之賊負創遁六月攻羅博瓦峯下色溯普大
岡賊於岡上設大碉六左右相應援海蘭察克其
中三碉額森特克其左二烏什哈達克其右一附

近山砦同時收取

上嘉之

製詩紀事有人人自為戰上下力各努盖自用兵來斬
獲斯為巨之句七月海蘭察進攻該布達什諾令額
森特下溝攻色溯普左偏且繞賊後時大雨額森
特偵賊不備砍柵直進遂克二木城毀之

諭曰額森特見海蘭察立功居多思奮勉自勵故不避
雨凜將二木城立時攻拔均屬可嘉未幾額森特迭

見該布達什諾各砦煙起知海蘭察等兵至賊志
往救色溯普之右備禦必疎即督兵下溝上色溯
普後山結營時額森特兵少適海蘭察率兵二千
來助額森特遂順下山梁奪獲筆朗納克及該筆
達烏等砦

諭曰額森特原係勁將自派往軍營奮勉出力調度得
宜首先殺賊從前賞給丹巴巴圖魯名號今改墨爾
根巴圖魯並賞銀二百兩現在大兵已圍遜克爾宗

其益加奮勉迅奏膚功時額森特駐遜克爾宗之右
海蘭察在其左中間岡脊尚有札木咱克等碉為
賊屏蔽我兵攻之焚其寨落風大作火熾燬平房
碉卡二百餘八月額森特伐木立柵與海蘭察督
攻

諭曰海蘭察額森特等所帶官兵直至賊碉之下或携木
梯攀上或拆缺口衝進並將碉內之梯用力拔出斷
賊人上下雖黠賊於地窖深藏未能攻得而官兵如

此奮勉實屬可嘉九月壬子攻遜克爾宗水碓斷賊
汲丁巳日出進攻官寨旋佯退日幾中忽從叢木中
躍出驟逼寨牆賊鎗石爭發持至日昃他寨賊來
援我兵乃撤庚申復攻之額森特鼻受石傷又鎗
傷其足居數日望遜克爾宗右有寨四乃與烏什
哈達協擊克其一海蘭察亦取第二寨額森特遂
撲第三寨賊鎗折其弓殫傷及指仍取親隨之弓
連斃數賊

上以額森特被傷尚能換弓射賊嘉獎之

賞貂帽猞猁馬褂各一十月攻默格爾山額森特由
中路直前與侍衛官達色繞道之兵上下夾擊砍
破碉門殺二十餘賊餘墮澗死遂留兵令海祿等
據守而自與官達色趨上山梁時海蘭察已從深
箐中穿徑先至其西有密拉噶拉木碉共攻克之
乘勝並克凱立葉官寨賊自勒烏圍分三隊來援
我兵亦分三隊下壓賊大敗追數里斃賊百餘距

勒烏圍賊巢僅二十里得

旨嘉獎授叅贊大臣仍交部議叙額森特乘勝取布拉克森及格斯巴爾二山顧見日爾巴當噶有賊卡保寧等已破其山陽五碉賊竄山頂額森特追撲殺之格斯巴爾山下曰羅卜克鄂博其溝口尚餘七碉並焚燬於是凱立葉上下及附近寨落席捲殆盡

上獎其奮勉超羣著在乾清門行走十一月與海蘭察

各領一隊乘月黑額森特潛度溝突入格魯克古
丫口得碉卡二循山下抵桑噶斯瑪特其山分四
支前石城一後木柵三賊疊石墻掘地溝守甚力
乃與海蘭察分隊進殺二十餘賊拔石城各隊兵
亦奪三木柵遂由山足樹柵下抵河涯十二月攻
沿河寨柵射寨隙或拔寨木以擊之時沿河寨落
六處擦庸及羣尼為大四十年三月額森特燈羣
尼寨並奪擦庸寨及附近木柵石卡又與海蘭察

攻克上巴木通下巴木通及安吉達佳布至噶爾丹寺前所有賊寨百餘無敢復抗拒者

諭曰既得勒烏圍即須攻進噶拉依第恐逆酋負隅死守得之未能迅速勢必分兵馬爾邦夾攻此路兵自應大員帶往或派叅贊大臣則莫若派額森特阿桂當遵旨妥酌而行六月額森特由巴木通至直古腦山頂賊柵鱗次時領隊大臣福康安烏什哈達已得碉卡五十餘侍衛特成額亦克各山峯俱與額

森特合兵額森特遂偕福康安等焚冷角寺及側
近寨落壓至勒烏圍之上八月與海蘭察直趨勒
烏圍賊巢分兵圍其兩面勒烏圍之南為轉經樓
又過甲爾日磔橋而南為科布曲賊負高阻深互
為唇齒我兵攀援負戴攻擊益力竟克之時額森
特得傷不能乘馬

諭曰阿桂現派額森特在轉經樓前科布曲山下駐劄
以牽賊勢額森特雖未能上馬遠涉而防守是其所

長著令在勒烏圍一帶小心看守勿使隔岸之賊得
乘隙過河滋擾或至稍有疎虞九月額森特分兵三
路一攻甘都瓦爾一攻德里雅克角一攻鄂羅木
共得碉卡二十七寨落十六殺賊二百餘生擒三
十餘人後數日還攻科布曲克碉一時額森特所
駐與南路明亮兵僅隔一河明亮所攻之阿爾古
額森特先用礮摧之明亮奏入

上曰額森特雖未親身攻勦而於隔河施礮轟碉使賊

膽落如此不分畛域方無愧為叅贊益當努力自勉
共襄大功十一月海蘭察分兵三路合攻西里額森
特望見西里官兵轉戰而下即率保寧常祿保等
赴其山麓盡克其木城勒烏圍之前有山曰克爾
古什拉斯為進取噶拉依正道賊密布城碉為岫
負計額森特分兵六隊攻克之賊退守勒隈勒山
眷十二月額森特乘夜進攻賊死守前三碉乃繞
下山半攻其四五兩碉至曙賊見我兵盛自相驚

擾盡破之又勦其後兩碉及石卡九後數日額森
特由勒隈勒直取格隆古先奪其前三寨然後圍
其大碉賊突圍欲出我兵環殲之時海蘭察等攻
科布曲海祿攻魁窩兵皆合遂將科布曲旁砦乘
勢掃定賊棄索隆古而遁大兵將及賊巢賊尚以
布哈爾則朗噶克為門戶斫木塞道額森特率同
烏爾納那木扎彰霸等督兵進賊伏積木中發鎗
如雨我兵直進遂克布哈爾碉卡後數日由則朗

噶克立柵上逼先令官兵潛行叢箐間近賊碣伏
賊見我兵樹柵悉衆來援伏兵從箐中出擊賊驚
潰我兵乘勢進取瑪爾古當噶循山東下至克角
干登又下至喀爾巴河沿合圍噶拉依賊巢四十
一年正月額森特攻克喀爾巴山後燬附近寨落
直至河沿截噶拉依之左

諭曰叅贊大臣額森特奮勇出力茂著勤勞著賞給一
等男世襲罔替二月金川平凱旋

賜御用鞍轡馬一匹緞二十端銀千兩

紫光閣繪像列前五十功臣

御製贊云虎鎗隨圍覺與衆殊命往勦賊攘臂以愉閱
歷既多遂叅謀議獨當一面亦復集事四十六年三
月甘肅循化廳回匪蘓四十三因爭立新教聚衆
破河州焚蘭州關廟據華林山額森特奉

命馳驛至蘭州五月大學士公阿桂令額森特與海蘭
察明亮等分攻華林山擊敗賊衆閏五月破其四

卡賊於華林山前立大卡一通孔穴濬深溝為死
守計額森特等以鋏鑷開路擁進大卡殲守卡賊
於是賊傾穴出鬪額森特力戰得傷大軍合擊之
賊平

上以額森特進勦受傷仍能帶兵轉戰賞大小荷包以
褒其勇六月由一等男晉三等子爵四十七年十
一月卒子哈金泰以三等侍衛承襲三等子爵尋
病歿無子以侄伊爾琿阿襲

阿滿泰

阿滿泰滿洲正白旗人姓瓜勒佳本黑龍江達呼
爾披甲乾隆二十四年閏六月派赴西路軍營攻
喀什哈爾城七月又隨大兵由阿拉楚爾趨至巴
達克山擒賊人霍集占等俱有功三十四年奉

旨住京挑為護軍尋補粘竿拜唐阿三十七年

賞戴藍翎三十八年授藍翎侍衛是年從征金川攻當
噶爾拉山梁後一月又攻當噶爾拉之第五碉皆

克之三十九年二月賊從庚額特山峽出將犯我
守兵阿滿泰偕叅領巴克坦布先據要地鎗矢齊
發賊被殪者多始退奉

上諭此次賊番竟敢從庚額特前來阿滿泰巴克坦布
帶兵奮擊甚為可嘉著存記檔案俟攻得馬爾邦一
併交部議叙七月冒雨進攻達爾圖山梁取其礮九
月副將軍明亮以木克什對面格木勺山其上賊
礮四座足望見我軍舉動且與甲索賊人往來將

角為我肘腋之患乃令阿滿泰分兵進攻以截甲
索來路次日和隆武等方攻木克什果有數百賊
趨前接戰而甲索亦有百餘賊壓至格木勺山為
夾攻之計並為阿滿泰所敗四十年二月明亮復
令阿滿泰偕滿衛阿蘭保等進攻科拉木達不避
鎗石奮勇仰攻直撲至礮前攀開鹿角拋擲火彈
賊捨死拒守別有援賊從西南下壓我兵分路迎
擊賊前行者多箭斃遂竄入深林繞出科布曲之

上合力死守我兵乃撤回

上以科拉木達雖殲賊十餘究未得有寸進進攻無益
不如徑赴宜喜為是四月攻加素得楞等山及儒集
寨以屢次奏功擢三等待衛

賜扎努恩巴圖魯號銀百兩閏十月攻獲扎烏古山梁
十二月攻加雜肚絨布巴魯擔諸處所得四功牌
皆頭等四十一年二月金川平凱旋繪像

紫光閣列後五十功臣

上命儒臣製贊曰志為氣帥敢戰者當宜喜得楞遂屢
受傷克扎什古攻碉拔柵不避險巇衝冒鎗石四
十二年十二月擢副護軍叅領四十六年隨大兵
赴蘭州剿撒拉爾逆賊從龍尾山踰水磨溝攻上
華林山累次克捷四十七年授護軍叅領四十九
年五月剿石峯堡逆回初隨海蘭察率數騎從隆
德間道偵賊底店途遇數十賊乘馬羣行擊敗之
奪其馬四乘勢窮追又擒獲放牧賊人取其牲畜

二百進攻石峯堡遂鋤賊巢

賞副都統職銜八月授頭等侍衛五十六年從征廓爾喀五十七年九月大兵攻擦木分為五隊阿滿泰從海蘭察一隊由中路直進連破重碉盡殲賊匪後數日進攻濟龍分撲其居中官寨俱勝之遂至熱索橋賊毀橋抗拒乃同哲森保等東踰栽綠大山繞至上流紮筏濟還破橋卡我兵盡渡有

旨授鑲紅旗蒙古副都統六月攻克協布魯遂分路從

海蘭察繞行時翁果爾海等為前隊阿滿泰等為
次隊珠爾抗阿等為後隊並抵博爾東拉賊卡從
高下壓箭無虛發大敗賊人七月由噶勒拉乘勝
踰堆補木至帕朗古攻橋其北岸賊抵拒者既經
殺退南岸賊排鎗數層連環不斷且戰且撤其橋
阿滿泰率先衝奪與屯脩色丹巴皆中鎗落水死
我兵一擁遂過河流深急不獲撈其屍

賜卹銀九百兩致祭予全葬皆如例廓爾喀降列前十

五功臣繪像

紫光閣

上親製贊曰遇有絕險莫弗身先詎惟力勇寔以忠堅
攻堆補木奪橋命殞馬革未能更切哀憫

予騎都尉職世襲罔替

珠爾格德

珠爾格德吉林滿洲正白旗人姓鈕祜祿乾隆三

十三年授前鋒校三十七年授

乾清門三等侍衛三十八年

命赴金川軍營三十九年三月隨叅贊奎林攻斯底賊
碉奎林中飛石仍力鬪有兩賊握刀突至珠爾格
德連矢斃之餘賊逸

詔授頭等侍衛給扎克博巴圖魯號八月攻俄坡第二
碉賊於碉後穴地聚守倉猝不及施鎗石咸逸去
珠爾格德等追擊之

上嘉其奮勉大兵既取水克什據水卡斷賊汲道設伏

以待賊二百餘冒霧分路來犯我守碉土兵發鎗
抵禦伏兵起合擊敗之別有賊百餘自山下援珠
爾格德衝入賊隊手刃三人九月攻取木克什山
下三碉十月與都統和隆武等襲取日旁山後戰
碉十餘座平碉二百餘間日旁去勒烏圍賊巢近
東接谷爾提賊碉寨相望為必爭之地復與和隆
武乘夜攻克遂據之十二月授正紅旗蒙古副都
統四十年四月攻取達爾圖以下得楞以南各碉

七月師至石真噶珠爾格德等攻拔石城二木城
一夾攻丹扎木各寨焚之乘勝登山梁迎勦賊人
來援者賊目負箭奔竄八月賊棄克爾瑪礪寨遁
去我兵追殺至曲碩木官寨九月奎林率兵攻什
扎古珠爾格德與和隆武設伏琅谷奎林兵至奮
勇夾擊獲木城一閏十月進攻扎烏古山梁克賊
礪四卡八自日斯滿至巴扎木賊恃其地險礪多
在山梁拒守珠爾格德與和隆武分兵進一由山

梁仰攻一由箐內繞截連克賊碉十七接通甲索
一路官兵曲碩木一帶俱望風而逃有達撒谷山
者賊列寨嚴守珠爾格德等分兵或攻旁卡或取
中寨擲火彈燬其垣賊燒斃無算遂進克乃當獨
松諸卡拉爾舍斯滿番衆悉降四十一年二月金
川平凱旋

賜銀幣

命圖形

紫光閣

御製贊曰奎林深入賊及將及發矢斃之險中救急同心合力共集大勲寫圖旌壯惇史流芬四十四年卒

台斐英阿

台斐英阿滿洲正白旗人姓庫雅拉乾隆三十六年由護軍補司轡長三十八年授

乾清門藍翎侍衛三十九年三月奉

旨赴金川軍營領隊剿賊七月與海蘭察官達色進取

喇穆喇穆以西賊碉碉高踞峯頂石壁陡滑我兵
用夜半蟻附而登抵碉根而伏黎明砍碉門躍入
盡斃賊衆又進撲尾碉及木城兩座次日大霧瀰
漫乘勝循喇穆喇穆山梁下剿西南兩山麓皆克
之

命從優議叙後數日復與海蘭察官達色帶兵三隊突
至該布達什諾躍過賊濠燬其碉殲賊無遺又有
木城在山巒突起處賊聚守甚堅海蘭察從山溝

繞攻賊後台斐英阿隨與官達色海祿等直撲其
前賊於木城外增柵兩層柵外皆深溝而柵中放
鎗擲石我兵不避危險架木踰溝破前柵至內柵
賊守禦益力我兵手指多傷因暫撤後數日復攻
克之乃與海蘭察兵合並赴色溯普峯巒之左時
額森特等在其右兩兵夾攻同時俱克十月又攻
克默格爾山梁有

旨嘉其奮勇擢三等侍衛十一月由羅卜克鄂博直下

山溝值林深月黑搶上格魯克古山口崖礪壁立
手足齊攀平明已據其上凡越山溝四山梁五克
獲賊碉甚衆再交部優叙四十年正月攻克康薩
爾二月攻羣尼諸寨擊敗得式梯援賊又攻據勒
爾吉博山麓三月南路宜喜請增兵於是同海蘭
察率千人赴之進抵薩克谷山梁賊望見我兵即
用排鎗迎擊驟如飛電我兵奮勇入所向無前將
山梁克獲復選健銳預伏要口賊夜半果集將擾

我新立營盤伏兵起擊大敗之次日達爾圖及得
楞諸賊相率逃遁我兵急躡之賊遂崖死者無數
四月從攻得楞東麓奪石卡二乘勢下壓又奪石
卡一五月分率遊兵為海蘭察額森特普爾普諸
路策應六月與福康安分攻巴占寨賊抵拒不遺
餘力乃從舍圖枉卡進至拉枯寺之上適額爾特
攻得昆色爾台斐英阿乃將附近各寨縱火焚燒
進圍喇嘛寺飛騰而入均予誅斃毗連卦爾沙已

諸處悉行掃蕩凡經三日夜廓清賊寨縱橫三四
十里

諭曰此次攻碉將士踴躍倍常其中勇銳出衆之人著
阿桂查明未得巴圖魯號者即奏請賞給於是得拉
布凱巴圖魯號是月進攻章噶山峯海蘭察直勒
正面官達色撲其右台斐英阿偕普爾普截其左
破之遂趨上舍爾都拉後山將兩峯佔據海蘭察
踰溝上攻托魯古賊從箐中放鎗力拒而台斐英

阿別從險處潛登所有碉卡立時盡得由此循山
麓而下即勒烏圍賊巢巢礪甚高礪下一路賊往
來應援恃大碉外蔽我兵莫能擊斷乃謀以晦夜
與普爾普瑚尼爾圖額爾特先合攻其碉賊極力
捍禦牆上擲石又穴孔放鎗我兵運柴捆堆室隨
以藥彈拋入須臾火發賊從煙中突出被鎗箭殪
盡遂同搗勒烏圍自南分攻八月十五夜克之賊
退保噶拉依窟穴九月海蘭察析兵七隊而台斐

英阿領其一皆持三日糧從巖崖懸陡處攀藤上
下夜半大風雨毫無畏阻抵達烏達圍天明至當
噶克底乘雲霧四塞薄其碉壁開碉門賊衆無得
脫者

上以諸將領冒雨衝泥攀崖越險甚屬可嘉各馳賞荷
囊以示獎勵十月攻西里之奔布魯山官兵從賊礮
中挈柵進台斐英阿與瑚尼爾圖帶兵防護遂全
勝烏西里山下曰舍勒固祖魯曰瓦喇占最為扼

要由瓦剌占至河復有薩爾歪三寨每攻皆克遂
望科布曲一氣仰攻而上進至雍中喇嘛寺喇嘛
盡數來降十二月擢二等侍衛四十一年正月圍
困噶拉依二月賊出寨就俘金川平四月振旅還
京師

賜宴

賞緞十端銀百八十兩繪像

紫光閣列前五十功臣

上自製贊曰一木曷支衆擎易舉嘉我諸臣心同力努
人自為戰各有所成攻康薩爾直進賊營四十三年

九月扈

蹕盛京加一級四十六年四月赴蘭州軍營勸撒拉爾
逆回至則與海蘭察帶兵三千五百敗賊於龍尾
山梁繼由龍尾山踰水磨溝馳上華林殲賊甚衆
五月與額森特明亮率滿洲步兵設伏水磨溝以
備賊閏五月與舒亮三德等率滿漢兵由華林山

南直壓賊卡逾數日遂取其卡四六月合圍賊營
犁至華林寺賊既平隨軍凱旋擢頭等侍衛尋以
圍場逸獸議奪俸又以署翼長時造冊遺漏奪俸
一年四十九年六月從剿甘肅石峯堡逆回有功
賞副都統職銜九月補公中佐領五十年六月補

御前侍衛旋授正藍旗滿洲副都統五十三年擢正紅
旗護軍統領五十六年調鑲黃旗以失察護軍盜
銀鑄二級留任是年從征廓爾喀五十七年六月

大兵分隊攻擦木從將軍福康安為諸隊策應並毀賊所立垛牌及攻濟龍我兵五路進台斐英阿率索倫勁騎于山坡要地往來衝擊師至協布魯賊據橋守禦不得渡台斐英阿別逾薩木那山襲取賊寨而協布魯兵亦入至東覺山遙見賊碇甚密於是大兵復出奇旁繞而台斐英阿仍從正路牽綴東覺山賊勢連日礮轟殪紅衣綠衣兩賊目及賊兵無算乘隙渡河取賊寨十一生擒七十六

賞都統職銜兼授散秩大臣七月大兵連破噶勒拉及
堆補木二山至帕朗古奪橋進逼甲爾古拉山賊
三路來犯台斐英阿射斃紅衣賊目二人旋中鎗
卒於陣

賞世襲騎都尉又一雲騎尉

賜卹銀千兩致祭予全葬立碑皆如典禮謚果肅廓爾喀
畏懼乞降大兵還台斐英阿列五十功臣再繪像
紫光閣

上製贊曰首攻擦木繼克濟寵身先士卒奮勇成功遂
至帕朗逼甲爾古直進殞身痛惜心楚

欽定八旗通志卷一百六十三

欽定四庫全書

欽定八旗通志卷一百六十四

人物志四十四

大臣傳三十

滿洲正紅旗一 何和哩 葉克舒
多積禮 和碩圖 托克推 法

譚 覺善 岱松阿 安達立 布丹 噶達
渾 碩詹 褚庫 瑚里布

何和哩

何和哩姓棟鄂其先自瓦爾喀遷於棟鄂因以地
為姓祖曰克徹巴顏父曰額勒吉世長其部落何

和哩代其兄屯珠魯巴顏為部長歲戊子聞

太祖高皇帝納妃哈達身率甲士三十人護從以行比還
遂以所部軍民來歸隸滿洲正紅旗

太祖以長女妻之初設滿洲八旗隸正紅旗為總管一旗
大臣戊申年從征烏拉率本旗兵破敵有功辛亥
年奉

命同額亦都等督兵二千征窩集部之呼爾哈路攻札庫
塔城圍三日招之不下攻拔之俘斬甚衆遂降其

環近諸路取五百戶以歸癸丑年從

太祖再征烏拉時布占泰與葉赫期送其子為質將行我師先一日至進克郭多鄂謨二城即駐其地翌日布占泰率兵三萬越富勒哈城而軍

太祖欲戒諭之冀其悔罪求和何和哩與諸貝勒大臣並
以布占泰反覆難信奮然曰我軍士飽馬騰利在
速戰所慮者布占泰不出耳今敵軍既出平原廣
野可一鼓擒也鼓勇進擊克其城滅烏拉天命四

年明經畧楊鎬率六總兵分四路來侵

太祖親統師禦之明兵皆潰六年下瀋陽遼陽前後降七十餘城何和哩並身在行間歷有勞績以與費英東等綜理軍國庶務稱為五大臣叙功授三等子世襲九年八月卒年六十有四

太祖聞之震悼曰天何遽奪朕股肱耶

太宗文皇帝時晉世爵為三等公

世祖章皇帝順治十二年追謚溫順勒石紀功

世宗憲皇帝雍正九年加封號曰勇勤子六人多積禮和
碩圖都類別有傳

葉克舒

葉克舒姓輝和世為尼瑪察部長

太祖高皇帝初年隨其父泰松阿以所屬來歸隸滿洲正
紅旗授佐領天命六年從大兵攻遼陽敵出城嚴
陣以待葉克舒衝鋒奮擊有功授二等輕車都尉
世職沙嶺之後先衆殺敵晉爵三等男

太宗文皇帝即位擢列十六大臣佐理正紅旗事天聰五年任兵部承政六年授都統八年八月率本旗兵隨大貝勒代善征明入得勝堡畧大同取城堡西至黃河合兵朔州十一月考滿晉二等男九年

詔貝勒多爾袞征明由大同進師分遣葉克舒隨貝勒多鐸營寧遠錦州界以制明援兵斬明副將劉應選俘獲遊擊等官崇德元年隨武英郡王阿濟格征明入延慶州克十二城凱旋以葉克舒還軍時縱

兵失伍及攘獲擅殺諸罪罷都統任削爵仍管佐
領事二年正月

命同承政尼堪等率甲士百人會外藩諸部兵征瓦爾喀
師出會寧遇朝鮮兵於吉木海我兵馳擊斬其平
壤巡撫及兵二千餘敵兵繼至又敗之降其哈忙
城巡撫總兵又各邊副使等官斬馘無算進畧瓦
爾喀以所獲牲畜分給外藩隨征將士遣之各還
所部十一月偕叅政星訥分統左右翼往征卦爾

察至黑龍江俘獲甚衆明年班師

特遣大臣迎勞尋任兵部右叅政四年七月授副都統十
一月與刑部承政索海統右翼兵征索倫部至雅
克塞城攻克之敗其部長博穆博果爾而還五年
四月復任都統七月叙功授騎都尉世職得

優賞部議征索倫時葉克舒督造監獄不堅致俘囚逃逸
應罰鍰追奪

賜物

上以葉克舒功罪相抵免之是月隨睿親王多爾袞圍錦
州與都統圖爾格率所部三百人設伏錦州西南
烏欣河追捕城中出牧牲畜敵兵千餘逆戰葉克
舒馬中矢蹶圖爾格馳救之上馬復戰殺敵數人
比還敵引兵潛襲我後葉克舒收兵還擊敵衆奔
潰以功復晉三等輕車都尉六年三月坐阿徇睿
親王等私遣官兵歸家及離城遠駐罪罰贖九月
復隨貝勒杜度圍錦州與都統譚泰阿山等掘濠

環守擊明總督洪承疇兵於松山七年三月

召還先是護軍統領噶布喇失律敗績葉克舒與都統譚泰瑪喇希承勘坐推諉支吾論應罰鍰及錦州騎兵之出犯鑲紅旗營也葉克舒以脩禦失宜調遣不當致傷士卒復議罪應罰鍰并追奪

賜物償給陣亡士卒

上命免其承勘所坐罪餘悉如部議十一月貝勒阿巴泰等征明師至黃崖口葉克舒與都統譚泰定議分

兵兩路夾擊遂奪邊口薄長城葉克舒麾軍先登
敵兵潰走進攻薊州敗明總兵白騰蛟白廣恩諸
軍尋遣兵攻孟家臺三十人陷於敵八年師還下
部勘訊葉克舒辨稱敵欲歸順因遣兵招撫以致
陷敵

上以葉克舒輕進失利又設詞說辨論罪罷都統任削世
職順治元年三月

世祖章皇帝命為副都統駐防寧遠四月大兵入山海關

擊流賊李自成葉克舒率駐防兵與賊步戰身被
三十一創戕一目戰彌厲大破賊衆二年隨肅親
王豪格征山東時賊渠十餘輩悉據滿家洞憑險
為巢凡二百五十一岫葉克舒與尚書車爾格合
兵搜剿殲渠魁以土石湮塞諸洞口餘寇悉平叙
功復予三等輕車都尉世職旋晉二等三年授總
管鎮守

盛京屢遇

恩詔晉爵至三等男十四年以

昭陵總管鐘奈有罪葉克舒坐不舉劾免官並革世爵十

五年卒長子道喇別有傳次子夏穆善官侍衛屢
著戰功贈世職二等輕車都尉第三子瑚葉官護
軍叅領以軍功授世職三等輕車都尉

多積禮 弟都類

多積禮滿洲正紅旗人姓棟鄂額駙何和哩次子
也初任佐領事

太宗文皇帝於藩邸從征烏拉有功天聰三年

上親征明至燕京多積禮以叅領從攻奪土城關五年從
征明圍大凌河城屢敗敵兵敘功授三等輕車都
尉世職崇德元年率師征瓦爾喀部俘丁壯三百
餘婦女老幼數百獲牲畜豹皮等物凱旋

命禮官迎宴尋擢本旗副都統四年七月奉

命同鎮國公扎喀納等統兵駐守藩城屏城間會內大臣
多爾濟屬下數人竊馬由戍所遁去多積禮追之

弗及論罪革世職籍沒家產

命留弓矢甲冑及三馬與之仍管副都統事五年正月率

兵防禦錦州敵人稽察叛逃二月

命同叅領喀珠赴寧古塔集兵三百餘征烏扎喇部俘百

餘戶獲馬牛及貂貉虎狐等皮無算六月師還

遣官勞之即以所獲分

賜將士六年大軍圍明錦州明總督洪承疇集諸鎮兵十

三萬赴援據乳峯山松山列營

上統師親征屢敗明兵

上度明兵必夜遁分布諸將截其歸路多積禮受

方畧率騎兵循海濱追擊殲敵甚衆七年十月以年老罷

管副都統事順治五年卒多積禮之第五弟曰都

類初任佐領天聰時擢正紅旗都統以其為固倫

公主所出

命轄兩佐領入戶崇德元年冬同都統譚泰等圍朝鮮國

都樹雲梯登城城上兵不敢拒悉奔竄明年凱旋

部議在軍中時失察所屬違法亂行諸罪罰鍰奪
所俘獲三年隨貝勒岳託征明踰牆子嶺至密雲
敵以步騎三千逆戰都類與譚泰指揮所屬兩旗
兵夾攻敗之獲馬百駝二十遂乘勝畧地至山東
濟南府乃班師四年大軍征明錦州還有護軍囊
球安朱護許同行之阿蘭泰臨陣退縮都類不受
首詞且召阿蘭泰告之坐徇庇又以奉

命兼管外藩蒙古納其所饋獻承

旨詢問不以寔對及新附丁壯逃遁先後論罪罰鍰削一

佐領人戶罷都統任尋

命復任都統並

諭諸貝勒曰都類雖有罪念公主在仍令兼轄兩佐領人

戶是年九月屬下護軍碩詹首告都類征明山東

時徇隱家人盜馬等事索取降城中財賄且於濟

南府私發明德藩埋藏珍玩携歸下法司鞫寔論

死籍財賄珍玩入官

命免死納贖革職任所轄人戶歸隸禮親王代善應入官之物以其半與碩詹八年再起為都統妻以郡主封和碩額駙同輔國公篇古等率兵鎮守錦州

世祖章皇帝定鼎燕京敘入闕破流賊功授騎都尉世職命隨肅親王豪格征張獻忠道經西安分兵勦滅慶陽土賊會兵西充獻忠既殪復與都統準塔等分勦川北郡邑餘賊斬獲無算論功復屢遇

恩詔晉爵至二等伯順治十三年卒以其孫新達里襲

和碩圖

和碩圖滿洲正紅旗人姓棟鄂何和哩第四子也

初襲父三等子爵

太祖高皇帝愛其才以大貝勒代善女妻焉封和碩額駙
太宗文皇帝即位之初授為正紅旗都統天聰元年四月

從大軍征朝鮮五月又從征明攻錦州寧遠二城

著有勞績二年五月隨貝勒阿巴泰率師破錦州

杏山松山諸路九月從征察哈爾克其四路軍以

功加五佐領進爵三等公三年十月隨貝勒岳託
證明攻大安口敗其駐防兵於馬蘭峪再敗其援
兵于石門寨復從大軍攻遵化城受

上方畧率本旗兵攻其城西面之北克之十二月師薄燕
京結營土城闕明兵來犯擊却之復奮勇先驅敗
敵於蘆溝橋同副都統阿山等陣斬明總兵滿桂
孫祖壽生擒黑雲龍麻登雲以獻旋師攻克永平
四年正月率旗兵駐守灤州五年三月

上以御書三函分諭諸貝勒大臣等勉以殫心盡職時和碩圖已列八大臣遂陳疏自誓曰伏蒙

上諭諄切臣雖駑鈍敢不自懷兢業以圖報稱若知而不言畏罪緘默不勤理諸務以圖便安惟天鑒之八月我軍分圍大凌河城數重和碩圖以本旗軍當西面之北明兵突圍出偕都統葉臣等夾擊之追奔及城壕而還七年六月

上詢征明及朝鮮察哈爾三者何先和碩圖疏言宜先因

城堡然後相度明之邊界乘瑕而入若

天意佑我各城納款雖欲速歸勢必不能故必固城堡而後可無虞也其南面六城可暫停修築仍立界屯耕恐我兵去後各處敵人窺伺鞭長不及難以救援也惟將瀋陽牛莊耀州三城修理庶邊界內外皆可長驅矣逾月病卒年三十八

上親臨哭之順治十二年追謚端恪立碑紀功雍正九年賜勇勤封號子和爾本襲三等公爵尚主以祖父勲

賜勅免死二次崇德三年任護軍統領隨貝勒岳託征明
徇山東山西敗敵十餘陣所攻城堡輒下四年二
月以疾卒於軍年二十喪還

命部臣奠酒會部議護軍囊球等訐告同征之阿蘭泰臨
陣退縮事以前此和爾本從叅領魯克都之言袒
庇徇隱應削公爵不准承襲並奪所屬人戶奉

旨和爾本已故免究以其弟哲爾本襲爵

托克推

托克推先世居呼爾哈以地為姓兄納罕泰為呼

爾哈部屯長

太祖高皇帝天命四年十月納罕泰同托克推攜其親屬
及同部百餘戶來歸

上遣官迎之

御殿賜宴各與裘服奴僕田宅器用馬牛隸滿洲正紅旗
尋授納哈泰為理事大臣托克推為佐領

太宗文皇帝天聰三年托克推任護軍叅領從

上征明由龍井關入遇三屯營哨卒斬五人獲馬七旋護糧以行遇敵來刼復斬數人塞燾一遂會大軍攻克遵化州五年三月同叅領榜素等率兵百人赴明錦州斬其哨卒生擒間諜以獻八月

上統師圍大凌河城

命貝勒阿濟格移兵扼錦州松山要路駐營邀擊明兵之赴援者托克推率兵隨敵自錦州來犯托克推擊却之追至城下斬獲甚衆八年二月同都統阿山

等率兵畧錦州獲馬牛而還七月從

上征明大同凱旋出尚方堡遇察哈爾諸宰桑來歸

上命托克推率兵護降人家屬還

盛京是年彙叙有功諸臣予騎都尉世職九年同護
軍統領布哈等率兵畧明邊境至寧遠擒七人獲
馬四十牛百餘師旋出邊六十里敵以千人追襲
布哈殿後戰歿托克推同叅領阿濟拜巴圖魯哈
坦等還擊敗敵護所獲以歸即以牲畜分

賚之崇德三年八月隨貝勒岳託征明由牆子嶺入邊越燕京趨山東圍臨邑縣城托克推督兵樹雲梯攻克其城

賚良馬及白金四年六月擢正紅旗蒙古副都統崇德六年隨睿親王多爾袞圍錦州擊却明總督洪承疇援兵猝遇敵礮身中數創七年以疾解副都統任世祖章皇帝順治元年起為

陵寢總管二年九月卒年六十有三子摩和托襲職

法譚

法譚滿洲正紅旗人姓他塔喇初以護軍校從

太祖高皇帝滅葉赫取明遼陽擢任佐領天聰元年從

太宗文皇帝征寧遠擊敗明兵於城北山岡七年以克副

任使予騎都尉世職崇德三年隨貝勒岳託征明

自牆子嶺入敗密雲步兵趨山東攻克郟城縣四

年冬隨承政薩木什哈索海等征呼爾哈部攻克

雅克薩城五年春先還奏捷六年大兵圍錦州明

總督洪承疇據松山以兵犯我右翼法譚隨肅親王豪格率兵擊却之既而大兵圍松山敵復犯我前鋒汎地為我軍所敗將奔塔山法譚復偕衆追擊明兵赴海死者無算八年隨鄭親王濟爾哈朗征寧遠攻克前屯衛中後所二城

世祖章皇帝順治元年任叅領隨睿親王多爾袞入山海關以步兵擊敗流賊李自成叙功加一雲騎尉尋兼任工部理事官二年冬隨順承郡王勒克德渾

征湖廣明年春自成遺黨一隻虎犯荊州法譚直
入賊營多斬獲追擊之宜昌自成弟李孜及偽磁
侯田見秀偽義侯張耐等俱率衆降四年考滿晉
三等輕車都尉五年擢右翼步軍總尉三遇

恩詔晉世職至一等輕車都尉兼一雲騎尉康熙元年以
病致仕三年卒

賜祭葬如典禮分世職為二以其孫鄂德襲三等輕車都
尉色勒壁襲騎都尉又一雲騎尉

覺善

覺善姓李佳世居薩爾澣城父通果事

太祖高皇帝任佐領隸滿洲正紅旗覺善襲管佐領事從
太祖滅葉赫取明瀋陽遼陽以功授騎都尉世職任叅領
天聰三年從

太宗文皇帝征明下遵化昌黎灤州永平諸城既班師貝
勒阿敏守永平覺善佐都統納穆泰等守灤州未
幾明兵圍灤州覺善勒衆出奮稍踰塹與叅領阿

爾津佐領庫爾禪直趨敵師敵潰奔旋集衆薄城
下覺善擊却之敵復發礮攻城壞堞堞覺善移兵
禦守敵不能登凡五敗敵衆會阿敏棄永平出關
灤州乏援諸將亦突圍走覺善復擊敗敵兵之阻
截我衆者與諸將偕還待罪

上以覺善守城力戰既出猶能殺敵釋其縛尋晉職三等
輕車都尉五年

上親統師圍大凌河城明兵自錦州猝至小凌河岸

上遣偏師渡河迎擊軍士不滿二百覺善入敵陣陷重圍奮戰得出時我兵別與敵遇有軍校為敵所獲復援之歸明監軍道張春總兵吳襄率步騎四萬距大凌河十五里駐軍覺善隨貝勒碩託以右翼兵突入張春營敵挫衄敘功晉二等輕車都尉崇德五年授正紅旗副都統率兵駐防義州尋隨大軍更番圍明錦州明年春以攻圍不力論統師王貝勒及諸將罪覺善當削職籍家產半

命從寬罰鍰秋

上親征駐軍松山杏山間明兵謀奪我礮猝薄營覺善率
所部禦擊敵敗遁我軍圍松山掘壕立營敵乘夜
來犯復戰卻之八年正月與副都統譚布等率兵
駐守錦州九月隨鄭親王濟爾哈朗征寧遠敗明
總兵吳三桂邀戰步騎進至前屯衛敵悉衆出拒
我巴林喀喇沁蒙古兵失利覺善率右翼諸佐領
下兵各二突前奮擊大敗敵城遂下

世祖章帝順治元年大軍入山海關擊流賊李自成賊
以馱來犯覺善被傷仍奮戰敗賊二年敘前戰功
晉一等輕車都尉又一雲騎尉尋隨順承郡王勒
克德渾至江寧會自成餘黨一隻虎等寇擾武昌
襄陽荊州諸郡

詔移師征之三年二月師至石首聞賊在荊州順承郡王
令覺善與都統葉臣等率精銳馳壓賊營賊方攻
城悉驚潰我兵截擊俘斬畧盡復分勦遠安南漳

宜昌賊衆次第就平十月凱旋

賜黃金十兩白金三百兩時山東土賊作亂侵擾恩縣齊

河平陰等邑覺善受

詔率兵赴勦斬賊首掃地王及其黨萬餘下所司紀功五

年正月江西總兵金聲桓據南昌叛覺善隨征南

大將軍譚泰都統和洛輝等往討七月師至南昌

賊悉步騎七萬拒戰覺善率精銳擊却之六年正

月大軍破南昌城聲桓中二矢投水死移師攻叛

鎮李成棟於信豐覺善督所部樹雲梯先登拔其城成棟亦溺水死師還贛州復分兵勦滅新喻安福諸賊黨先是遇

恩詔晉三等男爵至是敘湖廣山東江西戰功晉二等男賜號巴圖魯七年隨睿親王多爾袞畋於中後所坐私行射獵降一等輕車都尉兼一雲騎尉明年

上親政覺善訟鐫秩寬予復爵如故擢都察院左都御史尋解任仍專管副都統事兩遇

恩詔晉二等子十五年以老病乞休許之康熙三年卒年

六十有六

賜祭葬謚敏勇勒碑墓道子六人次子噶爾圖長子薩爾

圖先後襲爵第三子吉勒塔布別有傳

岱松阿

子阿納海巴漢

岱松阿滿洲正紅旗人姓佟佳世居雅爾湖

太祖高皇帝時授佐領

太宗文皇帝天聰二年隨貝勒岳託征明錦州獲人戶牲

畜復攻克十三站以東二十餘臺岱松阿同佐領
巴什泰先還奏捷七年

命同叅領英俄爾岱往朝鮮互市齎

敕責國王李倬背約附明倬惶恐上書謝罪八年以克副
任使予騎都尉世職九年隨副都統巴奇蘭等征
黑龍江敘功加一雲騎尉崇德元年隨英親王阿
濟格征明昌平有俘獲二年駐防蓋州躡擊明兵
於旅順口獲敵船二斬二人擒七人以獻

命以所獲銀布賚之六年四月卒子阿納海襲世職任佐
領順治二年隨大軍勦流賊李自成於武昌追至
富池口獲賊船三年隨肅親王豪格征流賊張獻
忠師至西安聞叛鎮賀珍以馬步二千拒守鷄頭
關阿納海與護軍統領鰲拜等攻破賊營進征四
川屢擊敗獻忠部衆五年授工部理事官尋兼
任叅領六年隨征叛鎮姜瓖於大同掘壕圍城賊
數犯我汛地阿納海同都統噶達渾往來禦擊皆

克捷七年九月三遇

恩詔晉世職至一等輕車都尉十八年山東土賊于七作
亂阿納海隨靖東將軍濟席哈往征敗賊黨喬玉
季於連山賊復乘夜來犯我營阿納海奮力拒戰
中創卒晉爵三等男

子祭葬如典禮分世職為二以其子愛音布襲二等輕車
都尉而以岱松阿次子巴漢襲騎都尉兼一雲騎
尉巴漢初任佐領隨安南將軍明安達理駐防荆

州聞海賊犯江寧移師赴援擊敗偽都督楊文英等康熙五年愛音布卒無子即以所襲之職併於巴漢復為三等男十三年九月以叅領隨副都統碩塔穆森等征逆藩耿精忠師次安慶聞賊陷建德巴漢率兵偵探至赤頭關賊拒戰擊之潰導大軍進攻賊開北門遁遂復縣城十一月賊四千餘衆犯南康巴漢隨碩塔穆森等擊敗之斬級千餘獲器械無算十六年隨鎮南將軍莽依圖江寧將

軍額楚等征逆藩吳三桂由廣東進攻廣西破偽
總兵蔣雄於樹梓墟十八年偽將軍吳世琮犯南
寧大軍往援世琮率衆渡江屯新寧州西山下
列鹿角拒戰巴漢隨莽依圖等進剿斬獲無算世
琮負重傷遁南寧圍解二十年隨征南大將軍賴
塔規復雲南敗賊將何繼祖等於西隆州奪石門
坎黃草壩諸要隘遂趨曲靖會湖南四川兩路兵
攻克雲南城復隨都統希佛等追剿賊將馬寶巴養

元等於楚雄之烏木山敘功晉爵一等男二十九年三月卒子巴顏圖襲爵

安達立

子阿積賴

安達立滿洲正紅旗人世居葉赫姓納喇

太祖高皇帝時遣兵刈鐵嶺田禾有降明蒙古拒阻安達立先驅擊走之

太宗文皇帝時隨貝勒薩哈璘駐防牛庄追斬叛逃蒙古數人大軍攻明永平副都統阿山葉臣率二十四

人冒礮矢先登安達立與馬得

旨獎資師旋同叅領圖魯什偵敵建昌夜遇敵邀戰我軍
士有中矢墜馬者安達立援之出尋擢前鋒叅領
隨大軍入明邊攻寧縣城領所部先登繼復率四
十人伏忻口擊敵騎二百奪燾縣三生擒六人獲馬
五十餘及出邊都統圖爾格戰捷敵奔竄安達立
邀擊逐敵入壕殲殪甚衆崇德元年敘功授騎都
尉世職擢任正紅旗蒙古副都統三年冬隨貝勒

岳託征明距牆子嶺數里聞敵據隘口備甚固安
達立同都統恩格圖率所部蒙古別趨嶺右陟高
峯入邊遇敵騎七千迎戰先衆奮擊斬級無算遂
越燕京畧山東明年春師旋由青山口出邊擊敗
追躡敵衆攻克山巔一臺五月隨大軍圍錦州明
兵自松山杏山來犯安達立連戰皆捷六年復圍
錦州明總督洪承疇集援兵駐松山安達立率兵
破其三營敵自塔山來犯安達立奪其挨牌鏖戰

至日暮敵潰走翼日松山敵犯我右翼營安達立
復戰却之七年敘功加一雲騎尉尋卒年六十有
三子阿積賴襲世職任護軍叅領

世祖章皇帝順治元年隨大軍入山海關擊敗流賊李自
成追至望都復隨都統葉臣擊敗賊黨於懷慶進
攻太原屢挫拒戰賊衆又分兵敗賊於黃河渡口
尋署正紅旗蒙古副都統隨英親王阿濟格攻延
安城賊刦我輜重阿積賴擊之走追擊自成於武

昌屢破賊壘聞自成竄入九宮山復搜勦之前力其
黨甚衆敘功晉世職為三等輕車都尉四年兼任
刑部理事官五年隨鄭親王濟爾哈朗征湖南署
護軍統領分兵徇道州明桂王朱由榔以其衆據
永安關阿積賴破其柵壘皆潰遁獲馬二十餘七
年凱旋

賚白金三百兩

恩詔晉世職至一等輕車都尉兼一雲騎尉十二年卒子

海都襲

布丹

布丹姓富察世居葉赫

太祖高皇帝時來歸隸滿洲正紅旗分轄葉赫人戶授佐領尋兼任前鋒叅領

太宗文皇帝天聰八年從征明大同進攻萬全左衛城先登克之得

優賚予雲騎尉世職九年隨貝勒多鐸征明錦州師旋敵

猝追襲都統石廷柱部下兵有被困者布丹破敵
陣援之出是時

上別遣貝勒統師由歸化城征明山西布丹旋奉

命同前鋒叅領武拜等率兵百人往駐上都城舊址偵軍

事迎奏捷使偕還崇德元年隨武英郡王阿濟格
征明將入邊擊却敵騎擒其邏卒連破鵬鶚嶺長
安嶺二城皆督所部先登轉戰至涿州擒斬無算
既旋軍敵覲我輜重潛出居庸關設伏邀剋布

丹率兵衝擊敵皆潰竄四年同前鋒叅領沙爾瑚達等率土默特兵二百畧寧遠北界以數騎挑戰敵堅壁不出乃俘其採樵者以歸五年大軍圍錦州敵離城築臺布丹同前鋒叅領納海色赫蘓爾德馳擊斬四十人復追斬出城刈草者四十二人敵以三百騎一再來犯並擊之遁尋與納海色赫往小凌河遇明總兵祖大壽遣蒙古十七人自錦州至盡斬之六年明總督洪承疇集援兵據松山

我前鋒汎地布丹偕諸叅領奮戰却敵追斬十人
尋又擊敗杏山後敵騎七年錦州下敘功晉世職
為騎都尉是年冬隨饒餘貝勒阿巴泰征明入黃
崖口趨薊州擊敗明總兵白騰蛟白廣恩等斬獲
甚衆

世祖章皇帝順治元年隨睿親王多爾袞征流賊李自成
敗賊將唐通於一片石遂入山海關逐賊至安肅
望都屢戰皆捷敘功予騎都尉加一雲騎尉並世

襲罔替遇

恩詔晉一等輕車都尉九年擢任正紅旗蒙古副都統十

一年十月卒

賜祭葬如例謚毅勤子弼素理襲職

噶達渾

噶達渾姓納喇世居哈達

太祖高皇帝時有約蘭者率其子懋巴里等來歸遂隸滿

洲正紅旗噶達渾其孫也初任護軍叅領天聰二

年從

太宗文皇帝征多羅特部有功八年從征明山西克應州

城

賜人戶牲畜崇德五年隨大兵畧中後所同護軍統領敦
拜擊斬敵衆睿親王多爾袞等率師圍錦州噶達
渾領肅先進敗杏山騎兵旋往設伏松山敵至斬
十餘人敵據嶺列營擊手敗之復同前鋒統領勞薩
等合兵追襲抵北岡乃還七年隨豫親王多鐸征

寧遠敵出兵躡我後噶達渾先衆還擊敵潰走師旋有護軍達哈塔者中創仆掖之以歸順治元年擢護軍統領從大兵入山海關破流賊李自成以功授騎都尉世職二年隨英親王阿濟格追擊流賊至九宮山凡三敗敵三年隨肅親王豪格征四川師至西安分兵勦賊邠州賊渠胡敬德結營三水縣噶達渾與副都統和托攻堅直入拔其營復與護軍統領蘓拜哈寧阿副都統阿喇善擊敗高

汝礪武大定二賊兵於三寨山用步卒搜勦山谷
賊據巔以拒遣其衆左右馳下迎戰噶達渾與護
軍統領阿爾津奮勇斬殺連敗賊衆賊兵復犯正
藍旗營哈寧阿被圍噶達渾與阿爾津蘓拜疾馳
往援擊却之又破賊兵于增蓋尋擢戶部侍郎五
年三月調吏部侍郎六月敘功晉三等輕車都尉
十二月與阿拉善奉

命率八旗兵赴英親王軍協討大同叛鎮姜瓖至則七戰

皆捷賊黨自代州北關遁追斬無算遂平代州復
渾源州六年擢本旗蒙古都統仍任戶部侍郎七
年以從睿親王行圍私出射獵罷都統任降職為
騎都尉又一雲騎尉

世祖章帝親政擢戶部尚書明年二月噶達渾訟鑄職
寬

詔復職晉二等輕車都尉三月改都察院左都御史四月
以駐防河間佐領碩爾對許戶部給餉不均事下

部鞫訊坐隱匿不奏論削世職得

旨改罰鍰五月復調戶部尚書九月奉

命率師往征鄂爾多斯部九年擒斬叛逆蒙古多爾濟並

殲其衆于賀蘭山兩遇

恩詔晉三等男世襲尋調滿洲都統十年二月調兵部尚
書十一月奏言京城廣濶向設礮煤山以為信今
停止無憑集衆請用

盛京時鳴鼓聚衆之法疏入

詔白塔山及九門仍各設礮十一年三月敘功晉二等男

八月以濫引

赦例請貸行賄之雲騎尉呂獻忠罪

飭令回奏奏復稽遲下王大臣議坐削爵得

旨改降一等輕車都尉十三年海賊鄭成功潛乘海艘攻

臨閩安鎮遂犯福州

命赴定遠大將軍世子濟度軍隨同征討並

賜世子

敕曰凡爾調遣官兵勿令噶達渾離左右也既至與督臣
李率泰等會兵勦撫克復海澄分遣將領水陸並
進擊敗賊衆下泉州及惠安之海港衛復閩安鎮
斬賊數十級獲戰艦軍械洗除賊砦成功遁入海
十四年三月班師四月卒

賜祭葬贈太子太保謚敏壯子噶爾漢襲職

碩詹

孫達色

碩詹滿洲正紅旗人世居訥殷姓富察父舒穆祿

太祖高皇帝時授佐領既卒碩詹仍其任尋兼叅領

太宗文皇帝天聰五年同叅領杭什木沙爾瑚達等畧明
邊境斬三人擒哨長一哨卒五以歸八年以克副
任使予騎都尉世職崇德元年

太宗親征朝鮮克其國都國王李倧遁南漢山城進師圍
之倭倂妻子在江華島分兵攻取碩詹乘船渡海
衝越朝鮮戰艦繼佐領阿哈尼堪登島岸率衆攻
圍降其城敘功加一雲騎尉三年七月兼任刑部

理事官八月隨貝勒岳託征明由牆子嶺毀邊牆
入越燕京峇山東攻克禹城縣及平陰縣明年春
旋師出邊敵襲我後營碩詹同巴圖魯尼哈里等
擊却之敘功晉三等輕車都尉是年九月許本旗
都統都類征明山東時索降城中財賄又於濟南
府私發明德藩埋藏珍玩携歸下法司鞫實革都
類職籍財賄入官

命以其半賚碩詹尋擢戶部叅政五年三月大軍將征明

錦州

命碩詹赴朝鮮國安州徵其糧艘及水師由旅順口至大
凌河還報稱

旨秋隨大軍圍錦州我叅領禧福率甲士二十四駐守駱
駝山敵以步騎四百乘夜剽掠碩詹聞警言趨援同
禧福斬敵二百餘獲馬十六七年管正紅旗滿洲
副都統事

世祖章皇帝順治元年四月隨睿親王多爾袞入山海關

擊敗流賊李自成既定燕京改叅政曰侍郎碩詹
仍任戶部八月

上將遷都燕京

命碩詹統右翼兵留守

盛京十月隨豫親王多鐸由河南征陝西二年正月
擊敗自成迎戰賊衆連破賊營克潼關進取西安
復隨征河南江南是年敘山海關功晉二等輕車
都尉明年敘河南陝西江南功晉一等四年考滿

加一雲騎尉五年隨鄭親王濟爾哈朗征湖南時
衡州府為明桂王朱由榔之將所據六年四月碩
詹同都統佟圖賴伊拜等自湘潭進征距城三十
里有千餘人據橋立寨碩詹督兵擊敗之進奪其
寨斬其總兵陶養用遂定衡州七年凱旋

賜白金三百兩兩遇

恩詔晉爵一等男八年駐防河間佐領碩爾對訟戶部給
餉不均部臣並坐降革碩詹降世職為一等輕車

都尉復遇

恩詔加一雲騎尉九年以老病罷侍郎及副都統任十年
上念碩詹前此因給餉事降世職處分過重仍復一等男
康熙二年卒年六十有四

賜祭葬如典禮謚明敏以其孫達色法色分襲世職並授
二等輕車都尉達色尋任叅領十七年隨征福建
剿海賊鄭錦屢擊敗偽將軍劉國軒吳淑等拒戰
賊衆會國軒糾賊萬餘犯海澄縣達色赴援身冒

鎗礮力戰聞城陷自經死

詔如陣亡例子卹加一雲騎尉無子以世職予其弟法色
併襲改為一等男兼一雲騎尉

褚庫

褚庫滿洲正紅旗人姓薩爾圖先世居扎魯特祖
栢德遷居葉赫

太宗文皇帝天聰五年大兵圍明大凌河褚庫年十七從
征有蒙古驍將徹濟格突陣褚庫迎擊之生擒以

歸尋征明大同攻萬全左衛褚庫首先登城頸被
創猶力戰破其城論功予騎都尉世職

賜號巴圖魯授佐領兼叅領崇德三年任吏部理事官

世祖章皇帝順治元年隨英親王阿濟格追勦流賊李自

成由陝西至湖廣賊將吳伯益以賊衆三千拒戰

褚庫率兵擊敗之三年隨肅親王豪格征流賊張

獻忠同尚書星訥敗賊將高汝勵等於陝西進師

四川復屢敗賊兵六年隨大軍征叛鎮姜瓖圍大

同偽總兵楊振威糾賊犯正紅旗汛地並擾土默
特營褚庫連擊却之賊又犯鑲藍旗汛地同護軍
叅領瑚葉赴援以步戰敗賊衆賊平還京尋以值
宿失印鑰解理事官任仍管佐領兼叅領九年隨
都統噶達琿征鄂爾多斯部叛酋多爾濟於賀蘭
山俘戰甚衆屢遇

恩詔晉世職至二等輕車都尉十三年海賊鄭成功犯福
州時鄭親王世子濟度統師駐漳州遣副都統阿

克善偕褚庫率兵赴援賊以戰艦二百自烏龍江
來犯褚庫率本翼兵登舟奮擊敗之追至大江口
獲船十二賊又以千餘衆於江岸迎戰褚庫督兵
奮擊斬級二百餘

聖祖仁皇帝康熙二年擢正紅旗蒙古副都統三年敘累
次隨征功晉一等輕車都尉七年以年老解副都
統任十四年卒

賜祭葬如典禮謚襄壯子海存襲世職

世宗憲皇帝雍正十年入祀賢良祠

瑚里布

瑚里布滿洲正紅旗人姓赫舍里世居和多穆哈連父吳巴海當

太祖高皇帝討平葉赫時來歸授佐領俾分轄其衆瑚里布其少子也

太宗文皇帝天聰五年由佐領擢一等侍衛旋任前鋒叅領崇德三年隨貝勒岳託征明自密雲東北毀牆

子嶺入邊同護軍叅領魯克都等較手敗明步騎兵
獲馬駝百餘六年隨征錦州明總督洪承疇據守
松山瑚里布與前鋒統領勞薩率兵越濠誘敵出
戰奮擊敗之復同叅領席特庫布爾遜屢敗杏山
敵衆松山敵騎夜遁瑚里布沿海濱躡擊殲殪無
算七年三月駐師杏山敵騎四千餘自寧遠來犯
見我軍容盛却走瑚里布與前鋒統領努山追蹙
之連山尋遇沙河所敵兵五百欲走寧遠復擊敗

之十月貝勒阿巴泰統師征明

上命瑚里布與席特庫隨右翼軍入長城即以軍事還奏
於是大軍自黃崖口進克長城明總兵白騰蛟白
廣恩合衆數千邀戰瑚里布同諸將擊敗之於薊
州遂先還奏捷八年四月

上念征明大軍將出長城復

遣瑚里布與努山席特庫及叅領瑚沙羅實等率兵九十
赴界嶺口偵之遇明兵俘斬甚衆

世祖章皇帝順治元年冬

命英親王阿濟格勦流賊李自成於陝西瑚里布率正紅
旗前鋒以隨二年春師至綏德州賊乘我未列陣
掠取馬數十瑚里布追及之山巔擊潰賊衆盡獲
其所掠馬會自成奔湖廣大軍進征攻克安陸府
瑚里布敗賊獲戰艦追勦至九宮山五戰皆捷師
還敘功授雲騎尉世職三年隨肅親王豪格勦流
賊張獻忠過漢中擊敗叛將賀珍兵大軍將至西

克肅親王令瑚里布同叅領席卜臣率前鋒四十人持檄先行遇賊騎邀截突前衝擊斬三十餘級生擒二人進薄獻忠營斬其執燾者大軍繼進遂殪獻忠瑚里布復與都統準塔征遵義府過壁山縣擊潰賊衆數千六年隨鄭親王濟爾哈朗順承郡王勒克德渾征湖南攻圍湘潭徇衡州道州及全州皆有斬獲七年九年兩遇

恩詔晉三等輕車都尉十年擢正紅旗滿洲副都統十三

年遷右翼前鋒統領十五年隨信郡王多尼征貴
州十六年大軍克雲南明桂王朱由榔及其帥李
定國白文選等竄遁瑚里布與左翼前鋒統領白
爾黑圖率兵趨永昌渡潞江戰磨盤山克騰越州
窮追至南甸皆有功還京追論戰磨盤山時都統
沙里布遇伏陣歿瑚里布弗及援停止敘功仍任
前鋒統領康熙十二年五月

聖祖仁皇帝念瑚里布宣力有年克著勞績

特加太子少師十二月逆藩吳三桂反

命都統赫葉為安西將軍瑚里布以護軍統領為副將軍
率禁旅赴西安會同駐防將軍瓦爾喀進討十三
年正月

上念四川接壤滇黔恐為賊煽動

詔瑚里布與前鋒統領穆占簡精銳疾馳相機援勦三月
會師漢中賊黨已踞陽平關瑚里布同穆占攻克
之乘勝趨七盤關及朝天關連敗賊衆擒斬無算

遂進征保寧賊將吳之茂擁衆抗拒大軍鑿壕塹
與相持六月

上遣貝勒洞鄂為定西大將軍征保寧以瑚里布叅贊軍
務十一月提督王輔臣叛於寧羗

詔撤保寧兵還守要地瑚里布同赫葉等還漢中尋隨洞
鄂還西安十四年賊阻截棧道平涼秦州俱陷

詔趣進勦瑚里布隨洞鄂征秦州圍城四月克復之移師
征平涼距城數里駐營輔臣連結蜀賊阻大軍薄

城十五年

上以大軍久駐平涼未能攻取

命大學士圖海為撫遠大將軍收洞鄂等

勅印令受圖海節制瑚里布留供調遣十六年卒於軍子

剛元襲世職



欽定八旗通志卷一百六十四